

FIKAMBANANA DONNONS NOUS LA MAIN

Nanolotra fanampiana ho an'ny zaza kambotin'ny zandary tany Arivonimamo

Mitohy hatrany ny asa sosialy ataon' ny fikambanana Donnons Nous La Main, izay tarihan-dRamatoa Samirah, ho an'ireo fikambanana miahy zaza kamboty, sy ireo fianakaviana sahirana. Taorian' ny tao amin'ny Akany Avoko teny Ambohidratrimo dia ny Akany fitaizana ireo zaza kamboty navelan'ireo zandary maty amperin'asa tany Arivonimamo faritra Itasy indray, no notoloranan'ny fikambanana Donnons Nous La Main kilalao toy ny



Ny fanolorana fanampiana nataon'ny fikambanana Donnons Nous La Main, ho an'ny Akany mitaiza ny zaza kambotin'ny zandary any Arivonimamo.

jeux de société. Nisy koa ny fanolorana vary, menaka, savony, klin, voamaina, siramamy ary lafarina. Tao anatin'izany iha-

ny koa no nanolorana labatra sy seza ho an'ity akany ity ity, mba ho fanampiana ny fitaovana hampiasain'ny akany.

Velom-pisaorana ny fikambanana Donnons Nous La Main ny tompon'andraikitra ny Zandarimariam-pirenena tao antoerana, raha nandray ny fanomezana avy amin'ity fikambanana ity mpanao asa soa ity. Mbola hitohy hatrany ny fiaraha-miasa eo amin'ny roa tonta araka ny nambaran-dRamatoa Samirah ary hijery ny fikambanana tratry ny fahasahiranana ankehitriny koa ny fikambanana mpanao asa soa tarihany.

Helisoa

Fampianarana amin'ny tenindreny

Fampitana fahalalana mahomby indrindra

Ny Unesco, sampandraharahan'ny Firenena Mikambana miandraikitra ny kolontsaina sy ny fanabeazana, no nifidy ny 21 Febroary ho andro iraisampirenena ho an'ny tenindreny.

NY TOMBONY HO AN'NY TENINDRENY

Ny Unesco efa hatramin'ny taona maro lasa no efananambara fa ny fampitana fahalalana mahomby indrindra dia ny fampianarana amin'ny tenindreny, satria ny tenindreny no nandrafitra ny sain'ilay zaza hatrany ambohoka sy hatramin'ny fahakeliny, mora ho azy ny mandray ny fahalalana amin'ny tenindreny, fa raha tenimpirenany hafa dia lasa mpanao tsianjery maimbo ilay zaza, lasa mpamerina ny nataon'ny hafa fotsiny, fa tsy afaka hikarokaroka, voaporofa izany f'ireo manampahaizana mpikaroka na "savant" manerantany dia nampianarina tamin'ny tenindreny avokoa, na sinoa na amerikana na rosiana na karana na frantsay, sns... ary izay no mahatonga antsika malagasy manana manampahaizana be diplaoma, fa somary gisitra ihany eo amin'ny fanaovam-pikarohana ary matoa isika malagasy mifika mafa amin'ny fivavahana

krisitiana, tsy azo hozongozonina ny finoana dia satria nampianarina tamin'ny tenindre-ny ny bai-boly izay efa tamin'ny 21 Jona 1835 no efa voadika tamin'ny teny malagasy.

NATAO AMBANINJAVATRA NY TENINDRENY

Ny fitondrana tamin'ny Repoblika faharoa no niroso tamin'ny fanagasiana-na ny fampianarana, saingy tsy nahomby izany, tsy ny teny malagasy no tsy lavorary fa ny fomba nanaovana ilay fanagasiana mihitsy no tsy araka ny tokony ho izy, raha tsorina dia toa noken-drena mihitsy ny tsy ahombiazany, satria tsy nisy ny tetibola mazava nanofanana ny mpampianatra sy nanaparahana ny boky nampiasaina, nony ratsy ny vokatra azo dia nifandrombahana ny mitanisa ny hoe tsy lasa ilay fanagasiana, f'aleo miverina amin'ny teny frantsay ihany, ary vao mainka nohindrahainy ny "ecole d'expression française", izay mahatonga ny ankizy

malagasy ho lasa bolokimbazaha.

NY FANKALAZANA NY TENINDRENY

Mankalaza isantaona ny tenindreny isika malagasy, nanome lanja izany ny fitondrana notarihan'ny Filoha Ravalomanana, saingy nony tonga ny taona 2009 nandraisan'ny mpandroba fahefana, mpanongam-panjakana ny fitantanana ny firenena dia zara fa misy ilay andro iraisampirenena ho an'ny tenindreny, na izany aza, maro ireo manampahazana malagasy efa sahy mijoro tsy miandrandra ny fitondrana intsony, toy ireo akademisiana sy ireo mpampianatra sady mpikaroka eny amin'ny ambaratonga ambonny. Ny teny filamatra noraisina tamin'ity taona 2022 ity dia: "Ny fampiasana ny teknolojia amin'ny fampianarana mifototra amin'ny fimaroanteny : Fanambany sy Fanararaotra".

Ny Valosoa

Kolontsaina sy fanabeazana

75 taona ny AFT : Alliance Française Antananarivo

Ho feno 75 taona ny sabotsy 26 febroary ho avy izao ny AFT, na ny Alliance Française de Tananarive, na ny Alliance Française Antananarivo, ka amin'ny sabotsy io no hanokafana amin'ny fomba ofisialy izany fankalazana izay etsy Andavamamba. Ny fikambanana Fikoframa, na Fikambanana Koltoralay Frantsay sy Malagasy dia niova ho Alliance Française tamin'ny 26 febroary 1947, tao aorian'ny nandraketana izany tamin'ny Gazetimpanjakana na Journal Officiel. Ity Alliance Française teto Antananarivo ity no foibe ara-kolontsaina sy ara-panabeazana nijoro voalohany teto amin-



Ny AFT etsy Andavamamba.

tsika. Henri de Brugada no filoha voalohan'ny AFT tamin'ny nisokafany teto, tamin'ny taona 1972 kosa no nisy Malagasy voalohany nitondra ity AFT ity dia Pr Albert Rakoto Ratsimamanga. Teo Antsahabe no foiben-toerany tany am-piandohana, fa tamin'ny taona 1995 no

nanomboka nanamboarana ny tranon'ny AFT etsy Andavamamba. Andraikitra sahaniny ny fampiroboroboana ny fiteny Frantsay amin'ny lafiny rehetra, fanomezan-danja ny kolontsaina eto antoerana ary fampiroboroboana ny vakiteny. 7 ny filoha efa nifandimby ni-

tondra ny Alliance Française Antananarivo hatramin'ny nijoroany:

- 1947- 1972 : Henri de BRUGADA.
 - 1972- 1980 : Pr Albert Rakoto RATSIMAMANGA.
 - 1980- 2000 : Jacky Rakotobe ANDRIAMANALINA.
 - 2008 : Modeste RAKOTOMALALA.
 - 2008- 2014 : Julien RAKOTONAIVO.
 - 2014- 2019 : Henri RAZAFITSALAMA.
 - 2019 ka hatramin'izao: Monique RAHARINOSY.
- Fampirantiana lehibe mahakasika ny AFT Antananarivo, no hanokafana ofisialy izao jobily izao ny sabotsy izao.

Aly

Mpianatry ny Oniversiten'Antananarivo Tsy diso anjara tamin'ny fankalazana ny andron'ny skoto eran-tany

Tsy diso anjara tamin'ny fankalazana ny andron'ny fanabeazana skoto maneran-tany, na ny andron'ny mpamorona ny 22 febroary teo, ireo mpianatra notezaina tamin'ny fanabeazana skoto eny amin'ny Oniversiten'Antananarivo. Ho fanamarihana izay fankalazana ny tontolo andron'ny Mpamorona izay, nanao famoriana miaraka teny amin'ny Esplanade Ankatso, ireo Skoto lahy sy vavy maherin'ny 300 mianatra eny amin'ny Oniversiten'Antananarivo, avy amin'ny: Fanilon'i Madagasikara, Kiadin'i Madagasikara, Mpanazava eto Madagasikara, Antilin'i Madagasikara, Tily Eto Madagasikara. Ho fanabeazam-boho ny firahalahiana sy firaisankina eo amin'ny samy Skoto no natao tamin'izany. Fotoan-dehibe iray nanehon'ireo tanora ny anjara toeran'ny fanabeazana skoto eo amin'ny fiaraha-monina eny Ankatso, nanehoan'izy ireo fa velona ary miaina ny fikambanana, noho ireo tanora beazina sy mpiandraikitra, izay solofo sy dimby rahampitso.

Niaina



Ny hetsika teny Ankatso ny 22 febroary lasa teo.

Rivodoza Emnati, nahazo rano Androy Lasibatra Atsinanana, Vatovavy, Fitovinany, Atsimo Atsinanana, Ihorombe...

Ny fahorian'ny sasany tokoa hifalian'ny hafa, raha ny mahakasika ny fandalovan'ny rivodoza Emnati, satria azo lazaina ho velom-bolo ny tany amin'ny faritra Atsimon'ny Nosy, tany Androy sy Anôsy satria nahazo rano, nahazo ranon'orana, noho ity rivodoza ity. Sahirana tanteraka kosa ny faritra hafa, satria lasibatra fanindroan'ny rivodoza indray tamin'ity taona ity. Lasibat'i Emnati izay indray ny faritra Atsinanana, Vatovavy, Fitovinany, Atsimo Atsinanana, Ihorombe. Tratra koa ny faritra Anôsy ary Androy, fa ho an'ireto farany, azo lazaina ho ilain'izy ireo ny fisiana rivodoza, satria raha vao mahazo rotsakorana, sy rano avy amin'izany izy ireo dia afaka mamokatra, ary mety tsy ahiana ny hisian'ny kere amin'ity taom-pamokarana ity. Tany amin'ireo faritra hafa kosa, azo lazaina ho nandrava i Emnati, nanimba trano, foto-drafitrasa samy hafa, vovy isan-karazany, sns... Efa nivoaka an-dranomasina alina ity rivodoza ity, miha-tsy hatahorana intsony ny momba azy raha ny andron'ny anio.

Niaina

